

HIYBRIW

Hiybriw Biynimb Krays Ker Mindeyak Gok Kuyip Minj Tikyak

Minim Nind Niņep

Jiwda biynimb gok kuyip nep, yimb bap Hybriw apay. Minj kun biy, Jiwda biynimb Jiysis nup chingyak gok kuyip, tikiyak ak niņbun ak pen, bi kuyip minj tikiy ak aņgiy, ma niņbun.

Minj kun biy, Jiysis nup kirgiy, Jiwda giyিংgipay rek giniņg geyak niņiy, kuyip tikiy aņgyak, “Kanj siyysiyp tap gok pik simboņgyingipim ak, tap yikop kawnan paņg niņiy gipay rek giyিংgipim; Jiysis chinup nen aņgiy, likaņ nuk key Nop nup simboņgak ak, tap yomb yimb aņgyak.”

Minim Ar Keykey Mindip Rek:

Gor Ñinuk biyomb Nop rek nep mindip minim ak mindip, chapta 1:1-3.

Jiysis biyomb, enjol gok sikoy minim ak mindip, chapta 1:4-2:18.

Jiysis biyomb, Mosis yip, Josiwa yip bi sikoy minim ak mindip, 3:1-4:13.

Bi simboņgep nind mindyিংgipay gok, woņg giyak ak yikop rek giyak; Jiysis gak ar ak, tap yomb yimb gak minim ak mindip, chapta 4:14-7:28.

Jiysis bi Gor nup simboņgep yomb yimb ak, likaņ nuk key ak Nop nup simboņgek mey, Gor “tep” aņgek, tip ma kumniņgamb minim ak mindip, chapta 8:1-9:28.

Meymey siyysiyp pik simboņgyingipay ak, yikop pik simboņgipay; Jiysis chinup aņgiy kumak ak, ñin nokom yimb simboņgek mey, kim amjun rek ayip minim ak mindip, chapta 10:1-39.

Gor nup gosimb niņon chinup kond mindeniņgamb aņgiy, nup nep kond mindip minim ak mindip, chapta 11:1-12:29.

Yerip gey Gor niņek tep giniņgamb minim ak sek, minim aņg day jiwak ak sek mindip, chapta 13:1-25.

Gor Ñinuk Chinup Minim Anḡñak

1 ¹ Gor basind apis ikop kuyip minim anḡniḡ, bi minim nup anḡep gok gek, minim nup ar ak wisin niḡiy akan, day niḡiy akan, gos kiyk namb okok niḡiy anḡñiyiḡipay. ²⁻³ Nind kun giy gek, biynimb gok kuyip anḡñiyiḡipay ak pen, ñin kisen mindpun biy, Ñinuk ak key yokek apiy, chinup minim anḡñak. Pen Ñinuk nuk key ma mindip: Nop mindip rek nep mindip. Nuk kunep Gor ak mey, chinup sup melik puḡyomimb. Nop anḡek, Ñinuk miñmon tap okok maḡiysek alwol gayek mey, miñiy maḡiysek kond mindip. Nuk nep minim anḡek, miñmon tap okok timey ma gip, mindep nep mindip. Tap siy tap timey gach chinup ak nep anḡiy, kumiy tip ak tikjakiy, am Nop ñin yipund kind okok ken mindiy, woḡ jimñiy gipiy.

Enjol Gok Kayan Rek Mindpay; Jiysis Mey Biyomb Yimb Mindip

⁴ Nuk enjol gok rek mer: nup Gor Ñinuk apay rek, nuk Biyomb yimb. Yimb nuk yiy ar biyoḡ mindip. ⁵ Gor enjol nuk gok kuyip, bap minim anḡiy apkop, “Miñiy nup dipiyn ak, yip ‘Nop nuk;’ yand nup ‘Ñiyand’ anḡiy” ma anḡak. Akan pen: “Yip ‘Nap nak;’ yand nip ‘Ñiyand’ anḡiy,” ma anḡak. Ñinuk nup nep, minim kun ak rek anḡak.

⁶ Pen Ñinuk key yimb ak, mankumb biy yokniḡ, enjol gok yimb nup dand araniḡiy anḡak. ⁷ Pen enjol gok kuyip, minim ak anḡiy anḡak, “Enjol nuk gok gek, key yimb mindiy, yiḡgen rek diy opay anḡak.” ⁸ Pen Ñinuk nup minim ak anḡiy anḡak:

“Gor. Nand kiḡḡ gunap monmon gipay rek ma giniḡgamban; suḡ-tep mindiy, biynimb gok perper kond mindeniḡgamban. ⁹ Mindrep gipay ak nip tep gip, pen mindrep ma gipay ak nip tep ma gip. Kun ak nip anḡen, Biyomb key yimb mindpan. Kun ak buḡiy nand gok, beḡ nip okok mindpay; nand mey Biyomb yimb mindpan anḡak.”

¹⁰ Minim gunap sek anḡiy anḡak, “Nand Biyomb wosrey kondonḡ okok mindiy,

mankumb biy sek, semb biyoḡ sek alwol gaynak.

¹¹⁻¹² Tap kun gok mindiy, kurginiḡgamb rek ayip ak pen; nand mindnep mindeniḡgamban.

Tap kun gok, chech wor ay yapek, tuḡgasik key siḡak ay,

kisenimb aypay rek giniḡgamb ak pen;

nand Biyomb chin ak, kun ak rek ma giniḡgamban.

Nak mindpan rek nep mindeniḡgamban anḡak.”

¹³ Pen Ñinuk nup minim bap sek anḡak:

“Nand ñin yipund kind yand akniy biḡiḡ mindey, tap yerip yerip nip miluk niḡbay gok maḡiysek, talak miḡgan nip okok ayniḡgayn anḡak.”

Pen enjol gok kuyip, Ñinuk nup angak kun ak rek, ma yimb angak.
 14Kun ak enjol gok yerip rek mindpay? Kiyk Gor nup wonḡ giñemb gok mindyḡ, biynimb nuk perper mindeniḡambay anḡiy niḡimb gok kuyip, kond mindpay.

Gor Chinup Dak Ak Tap Yomb Yimb

2 1Kun ak minim anḡñey niḡbun ak, pisnep dinjun. Pen direp ma giniḡambun ak, gos yesek gunap niḡiy, yesek kind okok amniḡambun. 2Enjol gok nep, low minim ak dand apiy, Mosis nup ñiyak ak pen; biynimb minim kun ak kirgiyak gok, yiwur yomb yimb diyak. 3-4Kun ak chin Gor Ñinuk minim tep dand wip ak kirgiy, kim amjun rek ma ayniḡamb. Ñinuk ak key, minim kun ak dand apek, biynimb niḡiy diyak gok, chinup minim niḡind yimb kun ak niḡnimimb anḡiy, anḡñirep giyak. Pen gos kiyk anep niḡiy ma anḡyak; Gor kiy yip mindakniḡ, tap mageprek gunap giyḡ, chinup anḡñiyak. Gor gos nuk key niḡiy, Kawnan nuk ak yokek ap, biynimb gunap yip mindiy, key yimb geyak kunep niḡnuk. Kun ak mey, minim tep nuk ak, niḡind yimb aspay anḡiy niḡnuk.

Jiysis Nep Chinup Dak

5Pen Gor chinup di nuk yip jimñiy aysap minim apun ar ak, enjol gok biyomb koyonḡ rek, chin kayaḡ rek ma mindpun. 6Minim ar kun ak, Baybol buk ak tikiy anḡyak:

“Gor. Nand biynimb gok kuyip gos niḡiy dipan. Nand rek ma mindpay; biynimb yikop ak pen, yenen kuyip kond mindrep gipan? 7-8Nand genak, enjol gok biyomb rek mindeyak; biynimb gok tam okok rek mindeyak ak pen; miñiy biynimb gok kuyip gey, yimb mindek, tap maḡiysek kond mindpay anḡyak.”

Minim kun anḡiy tikyak ak niḡbun: miñiy tap gunap nep kond mindpun; ñin kisen ak apek, tap maḡiysek kond mindeniḡambun.

9Gor Ñinuk Jiysis nup yokek ap mindek ñin ak nep, enjol gok, biynimb yomb rek mindeyak: nuk bi yikop rek mindek. Pen yiwur yomb diy kumek, Gor gek miñiy Biyomb mindakniḡ, yimb nup nep apay.

10Gor nuk Biyomb tap okok maḡiysek gay kond mindip ak, niḡrep gip ak mey, biynimb kuḡaynep di miñmon tep nuk ak ayniḡ, Ñinuk Krays nup yokek apiy, minim nup ak niḡiy, miker ar keykey dak rek, chinup di Nop yip jimñiy ayip. 11Pen chinup dek, biynimb nuk mindpun ak, Bapiy chin nokom yimb. Chinup gek, nuk suḡ-tep mindip rek mindpun ak mey, mam ay anḡniḡ nambiḡ ma dip; wisimb yapiy nep anḡip. 12Nuk Nop nup angak:

“Mam ay sikop kuyip, kesim nip ak diñiyḡ, kamep anḡyḡ, yimb nip dand araniḡayn angak.”

13 Pen minim bap angak:

“Nup gos sek kond mindenŋayn; yip direp giningamb angak.”

Pen bap angak:

“Gor napan yip angak gok yip, mindpiyn biy angak.”

Jiysis Chinup Diyn Angiy, Biyimb Rek Ay Wak

14 Napan angak kun gok, kiyk biynimb ak mey, nuk biynimb yimb bap ay apiy, bi biynimb gek kumbay anup nangjiwyokak. 15 Kun gek mey, biynimb kumningambun angiy pernep gos par ay mindeyak gok, perper mindenŋiy rek ayip. 16 Pen enjol gok direp giyn angiy ma gak; Ebrahim Gor nup gosimb niŋak rek niŋbun kiŋiŋ ak, direp giyn angiy kun gak. 17 Ar kun ak nep, Jiysis chin mindpun rek biyimb ay apiy, bi Nop nup simbongep tep chin ak mindiy, chin tap siy tap timey giy, Gor yip jimniy mindonjun rek ma ayek, chinup di Nop yip jimniy ayniŋ kumak. 18 Pen ap man ar biy mindiy, chinup miker yerip yerip gip ak, nup kunep gek mey; niŋrep gip rek, chinup simb niŋiy kond mindrep giningamb.

3 1 Kun ak mam ay Gor niŋek tep gip gok. Jiysis bi Gor nup simbongep yomb yimb chin ak nup gosimb niŋyiŋ, Gor nup kisen gipun ak, nuk Bi yerip rek ak niŋrep ginjun.

2 Pen nimb gunap angningambim “Basind yes chin Mosis biyomb yimb; Jiysis bi yikop rek ayip angningambim.” Pen Jiysis nup gos kun ak rek ma niŋnimimb. 3 Gor Mosis nup, Niŋuk nup yimb dand ar biyon aranak rek; ma gak. Bi korip gipay gok yimb dand aranbay ak pen; korip gipay gok tap yikop; yimb ma mindip. Kun ak rek, Jiysis Bi yimb sek, Mosis beŋ nup okok mindip. 4 Korip tap gok biynimb gaypay ak pen; Gor tap okok mangiysek alwol gayak.

5 Pen niŋind: Mosis Gor biynimb nuk namb ak woŋ giŋirep giyiŋ, Gor chinup kisen giningamb rek, minim tep gunap angnak. 6 Pen Krays Gor Niŋuk yipund giy ak mey; chinup Gor kiŋiŋ nuk mindpun gok, bi korip nop nimb rek, kond mindrep gip. Nup chiŋgiy nep mindon mey, andkind apek, biynimb nuk nep mindonŋambun. 7 Kun ak Gor Kawnan angak rek niŋjun. Nuk angak:

“Niŋ biy minim yip ak anggey niŋiy, niŋdinimimb. 8-9 Nasind napis sikop wosrey, simiy niŋ jiwiy omiŋal miŋmon nep namb okok mindey, kuyip tap mageprek gok giyiŋ, kond mindenik ak pen; minim yip ak ma niŋiy, gos kiyk keynep niŋiy gey amyŋgip.

10-11 Kun gey, yip yiruk yimb gek angnik, ‘Per minim yip ak ma niŋdiy kun gipay ak, yand yip mindiy, aŋiŋ ay mindrep giniŋgiy angnik ak, ma diniŋgambay. Pisnep mer aspiyn angak!’

12-13 Kun ak mam ay sikop. Gor minim ak kirgiy, gos nimb key niŋnimimb rek ayip ak, niŋrep ginimimb. Miŋiy Gor minim niŋep niŋ biy, namam nanay gok yip, minim tep ak minek minek ang amiy apiy

giyɨŋ, mindrep ginimimb. Mer ak, Gor nup minim ak kirgiy, gos yesek ar ak apek niŋdand amiy, apyap pikniŋgambun.

¹⁴Pen Krays minim nind niŋiy aŋgñinik ak, niŋyɨŋ nep mindiy mey, biynimb nuk yimb mindoniŋgambun. ¹⁵Baybol buk ak tikiy aŋgyak:

“Miñiy Gor minim nup ak niŋiy, yiruk ma niŋnimimb. Wosrey minim nup niŋiy diyokpik rek, ma ginimimb aŋgyak.”

¹⁶Biynimb an Gor nup minim ak niŋiy, ma niŋjun aŋgyak? Mey Yisrel biynimb; Mosis Yijip nimb dand awak gok maŋgiysek. ¹⁷Pen biynimb an simiy ñin jiwiy ñin jiwiy Gor minim ak ma niŋey, kuyip niŋek tep ma gak? Mey Yisrel biynimb; tap siy tap timey giy, miñmon nep namb okok tang tang, tokiy ay kumyak gok nep. ¹⁸Gor biynimb minim kilis aŋgiy, ap yand yip ma mindeniŋgambay aŋgak gok an? Mey biynimb minim nup ma niŋniŋgambun aŋgyak gok nep. ¹⁹Kun ak niŋbun: nup gosimb ma niŋiy, nup ma chiŋgyak rek, am nuk yip mindrep giniŋgiy rek ma ayak.

4 ¹⁻³Pen chinup biynimb kisen dip gok, nund yip mindrep ginjun rek ma ayip aŋgiy, gos ak ma niŋjun. Pen minim tep nup niŋbun ak, niŋrep giyɨŋ mindenjun. Mer ak, basind apis sikop minim nuk ak niŋiy, niŋind aŋgip aŋgiy pen, ma giyak rek giniŋgambun. Kiyk minim nup ma dey, minim kilis aŋgiy aŋgak, ‘Kuyip den, ap yand yip aŋiŋ ay mindeniŋgiy rek ma ayip aŋgak.’ Tap alwol gayak ñin ak, tip kuyip ak gayrep gak ak pen; minim nuk aŋgak gok, niŋind aŋgip aŋgiy nup ma diyak rek, kuyip kirgak.

⁴Baybol buk ak tikiy aŋgyak,

“Gor ñin onep kaŋgol ak, miñmon tap gok maŋgiysek gaydiy, ñin ar ak aŋiŋ ayin aŋgiy, yikop mindek aŋgyak.”

⁵Pen minim kun ak nep tikiy aŋgyak,

“Kiyk ap yand yip aŋiŋ ay, mindrep giniŋgiy rek ma ayip aŋgyak.”

⁶Pen biynimb nind gok, gunap minim tep nup ak kirgiy, nup ma chiŋgeyak; biynimb kisenimb gok diniŋgayn aŋgak. ⁷Kun ak biynimb minim nup niŋiy kirgiyak gok kumey, simiy kuŋaynep yinek, basind yes Depiyt Baybol buk minim aŋgambun ak tikiy aŋgak:

“Ñin biy, Gor minim ak niŋyɨŋ, yiruk ma niŋnimimb; aŋgnimuj rek nep niŋiy, ginimimb aŋgak.”

Pen tip ak, “Ñin biy” aŋgak kun ak niŋbun: ñin nuk biynimb diniŋgamb ñin ak, mindep nep mindip.

⁸Pen nimb aŋgniŋgambim, “Gor wosrey yip ker apiy, aŋiŋ ayrep giyɨŋ mindeniŋgambim aŋgak ak, biyomb Josiwa basind apis sikop kuyip, dand miñmon Keynan amek, mindrep giyak ar ak, aŋgak aŋgniŋgambim.”

Pen ñin kun ak nep ma aŋgak; am miñmon Keynan mindyakniŋ, minim kun ak tip aŋgak. ⁹Kun ak chin nuk yip jimñiy mindiy, nuk yip aŋiŋ ay mindrep ginjun rek ayip. ¹⁰Nup chiŋgiy, nuk yip aŋiŋ ay mindrep giniŋgambun aŋgip minim kun ak; tap kilrimey akan, yerip yerip gon,

Gor chinup diniŋgamb aŋgiy niŋbun gok kirgiy, nuk ñin onep kaŋgol ak tap gaydiy, minek ar ak, aŋiŋ ay yikop mindek rek mindoniŋgambun. ¹¹Kun ak aŋiŋ aŋiŋ ma ayjun; chinup kinjeŋ pisnep pindak rek, korip miŋgan amiy, nuk yip aŋiŋ ay mindrep ginjun. Mer ak; biynimb chin wosrey mindyiŋgipay gok, apyap pikyak rek ak giniŋgambun.

¹²Yenen: Gor minim nuk aŋgek, kim mindeniŋgambun ak, baynat rek kind yimb. Namb chinup biyaŋ amiy, gos tep niŋbun akaŋ, gos timey niŋbun ak, di mis ayek niŋrep gipun. ¹³Yerip yerip gipun gok, Gor niŋmindakniŋ gipun; kapkap weygiy ginjun rek ma ayip. Pen nuk nep chinup kor giy, yerer gipun minim ak, aŋgŋiŋakniŋ aŋgŋiŋiŋgambun.

¹⁴Kun ak Bi Gor nup simboŋgep yomb yimb chin ak, am Nop yip mindip rek, minim tep niŋiy dipun ak, dinep mindonjun. ¹⁵Nuk ap lum ar biy mindyiŋgip rek, tap siy tap timey chinup lipiŋg dand amnimuŋ rek ayip gok sek, miker chinup yerip yerip gip gok sek nup kunep gak ak pen, nuk timey ma gak. Kun ak miker yerip yerip chinup gip ak niŋrep gip rek, chinup simb yimb niŋiy, ¹⁶bi nambnimb chin tep yimb ak mindip. Kun ak Nop Biyomb jel gip ak nup pirikiy, ma kirginjun. Chinup simb niŋiy, Ñinuk nup yokek apiy kumak rek, mindip maŋ siŋak amiy, tap timey gipun gok aŋyikon, chinup dep rek ayek, dinimuŋ.

5 ¹Bi Gor nup simboŋgep gok maŋgiysek, bi yikop biynimb namb okok nimb ak pen, Gor kuyip dek woŋg nup ak giyiŋg, biynimb tap siy tap timey giy, meymey siypsiyp dap ñey, bind ar ak pikdangiy, Gor nup simboŋg ñimbay. Woŋg kiyk bap pen, biynimb yikop Gor nup niŋey tep gek, tap gunap dap ñey pikñimbay. ²⁻³Pen bi Gor nup simboŋgep kun gok, biynimb yimb gok mey, kiyk key kunep tap siy tap timey giy, Gor nup tap simboŋg ñimbay. Kun ak biynimb niŋrep ma gipay gok, apyap pikniŋg rek gey, kuyip simb niŋiy, minim sayn apay. ⁴Kiyk key biyomb mindon aŋgiy, woŋg kun ak ma dipay; Gor Eron nup aŋgek giyiŋgip rek, kuyip aŋgek gipay.

⁵Ar kun ak nep, Krays yand biyomb mindiy, biynimb gok kuyip diyn aŋgiy ma aŋgak; Nop nep aŋgek, chinup nen Nop nup aŋgŋiŋ mindip. Nup aŋgak:

“Miñiy yand nip Ñiyand; nand yip Nap nak aŋgak.”

⁶Pen Ñinuk nup minim bap aŋgak:

“Nip aspiyn: nand bi yip simboŋgep Melkiysadek rek ak, perper mindeniŋgamban aŋgak.”

⁷Pen Jiysis man ar biy mindiy, nup ñaŋgŋiŋg geyak, Nop nup siy aŋgyiŋg, meŋg miŋgan dand araniy aŋgak, “Yip kond mindenimin. Pen kun kun ginimin ma aŋgŋiŋgayn; nand Biyomb ak, key niŋban rek yip ginimin aŋgak.” Kun aŋgek, nup kond mindakniŋ, kumiy tip ak tikjakak.

⁸Nuk Biyomb, Gor Ñinuk yimb ak pen; chinup gip rek nep nup gak. Nop aŋgak rek giyiŋg, miker yomb ak dak. ⁹Nop minim aŋgek,

mangiysek gak ak mey; bi suŋ-tep biynimb minim nup niŋiy dipay gok, di Nop yip jimñiy ayek, perper mindeniŋgambay. ¹⁰Pen ar kun ak nep, Nop aŋgak, “Nand bi yip simboŋgep Melkiysadek rek ak mindeniŋgamban aŋgak.”

Ñapan Ūaŋ Gos Niŋbay Rek Ma Niŋjun

¹¹Minim tiksipiyn kun biy rek, kuŋay mindip ak pen; kasek ma niŋbim ak, aŋgen kosyam niŋnimimb rek ayek kirpiyn. ¹²Nimbip per aŋgñimbun ak niŋrep giy, biynimb gunap kuyip aŋgñimbikip ak pen; kasek ma niŋiy, minim nind niŋep gok, nimbip tip aŋgñemb rek ayip. Miñiy tap kilis ñiŋnimimb rek ak pen; tiy ñimb nep mindpim. ¹³Ñapan ŋaŋ tiy ñimbnep mindpay gok; miñ ar ak tep, miñ ar ak timey aŋgiy, ma niŋrep gipay. ¹⁴Pen biynimb gos sek gok gi dand amiy, ar ak gep, ar ak ma gep aŋgiy, niŋrep gipay.

Ñapan Ūaŋ Mer Aŋgiy, Minim Niŋind Ar Ak Dinjun

6 ¹Krays minim nimbip per aŋgñimbay gok, soy aŋgiy soy aŋgiy ma aŋgñiŋgayn. Korip giniŋg, sap piŋiy tip tuŋjiwiŋ, tip ak piŋiy, tip ak piŋiy ma gipay. Kun ak chin keynep kilrimey giy mey, Gor biynimb nuk mindeniŋgambun aŋgiy, gos niŋyiŋgipun ak kirgiy, Gor Ñinuk nup yokek owak rek, chinup diniŋgamb aŋgey niŋnuk minim ak pisnep diy, nup chingrep giy mindenjun. Sap ak tuŋjiwiŋ, tip ak piŋyiŋg ma ginjun. ²Gor nup gosimb niŋiy, ñiŋg pikpun minim ak; ñin jun ar ayey, Gor Kawnan chinup wip minim ak; biynimb kumiy tikjakiy kuyip bilok ayek, gunap yiwur per diniŋgambay minim ak; tip ma aŋgñiŋgayn. Gor minim nind niŋbik kun gok, gos niŋnep mindyiŋg, minim nuk gunap niŋjun. ³Kun ak Gor chinup kond mindakniŋ, minim kun gok kirgiy, minim gunap aŋgon niŋrep giniŋgambim.

⁴⁻⁶Gor Ñinuk chinup aŋgiy yokak ak, nup gosimb niŋiy, Kawnan nuk ak diy, pen nup kirginiŋgambun ak; kisen yergiy nup tip ak gosimb niŋiy, nup chingiy, biynimb nuk mindoniŋgambun? Chinup direp giyiŋg kond minden aŋgiy, tap mageprek gok gek niŋnuk ak pen, nup kirginiŋgambun ak; mon kiros bak biyoŋ ñaŋgrimbikiy, aŋgjiwyak rek ak giniŋgambun. Biynimb kun giniŋgambay gok, tip ak aŋgon nup gosimb niŋniŋgiy rek ma aŋniŋgamb.

⁷Gor woŋg day nuk ak gek, miñmon pikyiŋg tap jakrep gakniŋ, nup tep yimb giniŋgamb. ⁸Pen kipil ñiwñiw sek gok nep jakniŋgamb ak; kirgek pisnep saŋgiy dek, kisen sup ñek yinimuŋ rek ayip.

⁹Pen buŋgiy tep yand gok. Minim yomb rek aspun ak pen, Gor nup kirpim aŋgiy ma aspun; niŋrep gim aŋgiy aspun. Yenen: biynimb nuk mindiy, biynimb nuk gok gipay rek gipim ak niŋbun. ¹⁰Gor ker mindpim ak, monmon ma giniŋgamb. Nup gosimb niŋiy, biynimb nup gunap

kuyip, per direp gipim ak, nuk sakiy ma giningamb. ¹¹ Pen chinup tep giningamb ak; nimb maŋgiysek ar kun ak nep gi mindiy, am nuk yip mindrep ginjun aŋgiy gos niŋbim rek giningamb.

¹² Yiruk yiruk ginimuŋ rek ayip ak, niŋrep ginjun. Nup gosimb niŋiy, minim aŋgayak ak gos sek kond mindiy, chinup direp ginimuŋ rek nep mindon mey, Nop chinup giningayn aŋgak rek giningamb.

¹³ Gor basind yes Ebrahim nup minim niŋind yimb ak aŋgning, biyomb nuk rek bap sek ma mindek niŋiy, bi gunap yimb kuyip ma aŋgak; yimb nuk key aŋgiy aŋgak, “Yand mindpiyn rek, nip niŋind yimb aspiyn; ¹⁴ nimbip kond mindnikniŋ, biynimb nand kuŋay yimb mindeningambay aŋgak.” ¹⁵ Ebrahim minim nuk kun ak niŋiy, kapkap kond mindek mindek, aŋgak rek nep gak.

¹⁶ Chin Jiwda biynimb minim kilis niŋind yimb aŋgning, biyomb bap yimb nup aŋgiy, niŋind yimb aspun apun. Kun gon, biynimb gok niŋiy, ak niŋind yimb aspay apay. ¹⁷ Kun ak rek, Gor yimb nuk key aŋgiy, kuyip den ŋapan yand mindeningambay aŋgak ak, ar bap key ma giningamb. ¹⁸ Kun ak, chin biynimb tap siy tap timey giy, pirik nup ker opun gok; gos sek mindenjun. Yimb nuk ak aŋgiy, niŋind yimb apiyn aŋgak ak; key ma giningamb. Chinup diniŋgayn aŋgek, kond mindpun rek nep giningamb. ¹⁹ Gor korip ŋiluk miŋgan suŋ-tep yimb ak chech band yiwgek, nup windin ma niŋbun ak pen, minim niŋind yimb ak aŋgek, kond mindpun. Minim kun ak, korip ŋiluk miŋgan nuk ak nimb wip ak mey, kamb kilis rek mindip ak; kawin kawin ma giningamb. ²⁰ Biyomb Gor nup simboŋgep chin ak, Melkiysadek woŋg gak rek giyn aŋgiy, tip chinup ak diy, tap siy tap timey gipun rek, Gor korip ŋiluk miŋgan suŋ-tep yimb ak nind amiy, chinup nen Nop nup aŋgning mindip.

Binak Melkiysadek Yimb Yomb Dak

7 ¹⁻² Melkiysadek kun ak nuk kiyŋ mindiy, miŋmon Salem kond mindiyŋ, bi Gor nup simboŋgep ak kunep mindiyŋip. Yimb nup ak tungandikiy, “Bi suŋ-tep yimb apay.”

Pen biyomb gunap ap, basind yes Ebrahim nup timey geyak, kuyip yuk yokiy, tap tep tep gok dand awakniŋ, Melkiysadek ap nup kinjeŋnamb ak niŋiy bilesiym gek, tap piliŋg dand awak gok, bilok Melkiysadek nup nokom nokom, Gor nup ŋimbay rek ak ŋiy, nuk tap maŋgiysek onep anjip gok dak.

³ Bi kun ak Gor nup simboŋgep ak pen, nonim kiŋiŋ ak kun giy mindip, nop nusind kiŋiŋ ak kun giy mindip aŋgiy aŋgey, ma niŋbun. Pen nup tikiyak ŋin ak, kumak ŋin ak aŋgiy kunep aŋgey ma niŋbun. Nuk bi Gor nup perper simboŋgip, Gor ŋinuk rek mindip.

⁴ Gor basind yes Ebrahim nup niŋek tep gek, biyomb mindeningamban aŋgak ak niŋbun: nuk biyomb mindek. Pen Ebrahim Melkiysadek nup

biyomb yimb mindek ak niñiy, tap piling dand apek gok, bilok nup gunap ñak.

⁵Ak nind yimb kun gak. Kisen Mosis nup tikeyak yomb giy, Baybol buk ak tikiy angyak, “Ebrahim tikek tik dand amiy, biynimb Liypay kiñij mindpay gok, Gor wong gey, tap yerip yerip diniᅅgambim gok, kuyip bilok nokom nokom opriyñ ñiy, nimb onep anjip ak dinimimb angak.” Kun ak chin Mosis low ar ak niñiy, ñimbem mam Liypay kiñij mindpay gok kuyip, per tap opriyñ ñiyiᅅgipun.

⁶Pen Gor basind Ebrahim nup niñek tep gek angak, “Biynimb nip gok direp giniᅅgayn angyi” minim anᅅñak ak, nuk bi gunap kuyip opriyñ ma ñiyiᅅgip; pen Melkiysadek ap nup niñiy, bilesiyim gek tap dand owak gok, gunap bilok nup opriyñ rek ñak. ⁷Kun ak Melkiysadek bi Gor nup simboᅅgep yomb yimb, basind Ebrahim bi yikop rek ayek, kun gak. ⁸Bi Liypay kiñij Jiwda biynimb opriyñ bilok ñiyiᅅgipay gok, mind dand amiy tokiy ay kumbay ak pen, Baybol buk ak, Melkiysadek kumiy wong kun ak kirgak angyi, ma tikiyak.

⁹⁻¹⁰Ebrahim Melkiysadek nup tap bilok ñak kun ak, ñapan ma tikak ñin ak ñak. Kisen mey, Aysek nup tikek, Aysek pen Jekop nup tikek, Jekop Liypay nup tikek, tikey amiy apiy gek, Liypay biynimb kun gok Gor wong gey niñiy, kuyip tap bilok ñimbay. Pen Ebrahim Melkiysadek nup tap opriyñ ñak ak, kuyip ma tikiyak won ak ñek mey, kiyk sek, layn kiyk gok sek Melkiysadek nup, opriyñ ñemb rek nep mindeyak ak niᅅbun.

Bi Gor Nup Simboᅅgep Kisenimb Ak, Bi Nindnimb Gok Tip Kuyip Ak Dak

¹¹Mosis Gor minim tikiy, kun kun ginimimb anᅅgek niñiy, Jiwda biynimb meymey siypsiyp tap gok dand amiy, Liypay bi gok kuyip ñey, kiyk pikdaᅅgiy Gor nup simboᅅgiᅅgipay ak pen; ak yikop ar ar nep giyak. Kun gey, Gor biynimb nuk mindembinup, bi kisenimb Melkiysadek rek key bap yokek awak ak ma yokpikop; Liypay bi gok, Gor nup simboᅅgiᅅᅅ nep mindembiyap. Pen tep ma gek, Gor kuyip kirgiy, bi kisenimb Melkiysadek rek bap yokak. ¹²Bi nup simboᅅgep nindnimb gok kuyip kirgak rek, simboᅅgiᅅgipay miñ ar ak sek kirgak. Kun ak miñ kisenimb chinup anᅅñimb ak nep diᅅjun.

¹³Bi simboᅅgep kisenimb yokak ak, Liypay biynimb tik dand amiy nup ma tikiyak; ¹⁴Jiwda kiñij ak nep tik dand amiy nup tikiyak. Pen Mosis bi Jiwda kiñij gunap, Gor nup simboᅅniᅅgiy angyi, minim gunap ma angak. ¹⁵⁻¹⁶Kun ak niᅅrep giᅅpun: Gor bi nup simboᅅgep nindnimb gok kuyip kirgiy, bi pernep wong giniᅅgamb kun ak, Melkiysadek rek bap dak. ¹⁷Yenen: Ñinuk Krays nup angak,

“Bi yip simboᅅgep Melkiysadek rek mindeniᅅgamban angak.”

¹⁸⁻¹⁹Liypay kiñij ak tap ñiᅅemb pikdaᅅgiy, Gor nup simboᅅgiᅅgipay ak pen; miñ nindnimb ar kun ak, perper mindonjun rek ma ayek, Gor gos

nuk key niñiy, miñ kisenimb ar bap chinup yomak. Miñ kisenimb dipun ar kun ak, tep yimb. Diy mey, Gor yip nep mindoniñgambun angyiy, gos sek kond mindpun.

²⁰Bi Gor nup simbonḡep nindnimb kun gok kuyip, minim anḡay, bi yip simbonḡep mindeniñgambim anḡak ñin ak, minim gunap sek anḡayak ak pen; woñḡ kun ak per gem amnimuñ ma anḡak. ²¹Pen Jiysis bi nup simbonḡep nuk ak anḡayniñḡ, minim anḡay anḡak:

“Nand per bi yip simbonḡep ak mindeniñgamban. Yand Biyomb ak niñind yimb apiyn; kisen minim bap key ma anḡniñḡayn anḡak.”

²²Gor Jiysis nup minim anḡayak kun ak niñbun: minim nindnimb ak wos mer ak pen; minim kisenimb ak wos yimb.

²³Bi Gor nup simbonḡep nindnimb gok, kuñaynep rek woñḡ kun ak diyak. Bap kumek, kisenimb bap anḡey, woñḡ kun ak gi mindyñḡip; ak kumek kisenimb ak mindyñḡip; ak kumek kisenimb ak mindyñḡip ak mey, bap per ma mindyñḡipay. ²⁴Pen Jiysis kun ak rek ma giniñḡamb; nuk per kim mindeniñḡamb ak, woñḡ kun ak ma kirginiñḡamb. ²⁵Nop nup per anḡniñnimuñ rek mindip ak, biynimb Nop ker mindniñḡ, nup anḡeniñḡambay, kuyip pisnep diy kond mindeniñḡamb.

²⁶Bi simbonḡep yomb yimb chin kun ak; Gor nup simbonḡep yimb. Nuk bi suñ-tep tap siy tap timey siskoy gunap ma giy; bi gunap gipay rek mer: mindrep yimb gip ak, yimb nuk yiy ar biyoñ mindip. ²⁷Bi Gor nup simbonḡep yikop gok, gunap per tap siy tap timey kiyk key gipay rek, tap pik Gor nup simbonḡ niñiy, kisen biynimb gunap timey gipay rek, tap pik simbonḡ ñimbay. Pen Jiysis chinup biynimb mañḡiysek, tap siy tap timey gipun ak niñiy, minek nokom yimb mon bak biyoñ simbonḡak. Mey tep!

²⁸Mosis minim tikek niñiy giyñḡipay ar ak; bi Gor nup simbonḡep gok sek, biynimb yikop gok sek suñ-tep yimb mindeniñḡiy rek ma ayak. Pen Gor minim nuk kisenimb anḡayak ak, Ñinuk suñ-tep Bi Gor nup simbonḡep perper mindeniñḡamb ak, chinup anḡayak.

Jiysis Bi Gor Nup Simbonḡep Yomb Yimb; Gor Anḡniñḡep Korip Semb Biyoñ Ak Mindip

8 ¹Pen minim aspun kiñiñ ak kun giy mindip; Bi Gor nup simbonḡep yomb yimb chin ak, am Nop ñin yipund kind okok ken mindip. ²Gor anḡniñḡep korip tep ak am minden anḡiy, Nop korip ñiluk miñḡan suñ-tep yimb semb biyoñ amiy, bi nambnimb chin ak mindip. Gor anḡniñḡep korip kun ak, biynimb ma giyak, Gor nuk key gak.

³Pen bi Gor nup simbonḡep yomb yimb lum ar biy gok, kaw meymey tap gok dap ñey, gunap pik Gor nup tep anḡiy, gunap pik tap siy tap timey giy gach sek mindipay rek, niñiy kirginimin apay. Jiysis gipay ar kun ak rek key kumiy, tip ak tikjakak. ⁴Bi Gor nup simbonḡep yikop gok Mosis low anḡiy tikak rek niñiy, tap pik Gor nup simbonḡyñḡipay. Gor

angak rek, bi Liypay kiñiñ tikyak gok nep, kun giyিংgipay. Jiysis nup Liypay kiñiñ tik dand apiy ma tikyak rek, nuk lum ar biy nep mindiy, kiy yip tap pik simbonḡ ñiyiñ ma mindombikop. ⁵Pen Gor nup lum ar biy, tap pik simbonḡyিংgipay ak, kawnan pañḡ niñiy gipay rek nep giyিংgipay; tap yimb ak mindip semb biyoñ. Mosis Gor angñiñep sel korip ak giniñ gakñiñ, Gor angak, “Chir yirik okok mindiy, ‘Ser korip yip ak giy, tap gok kun kun giy aynimin apiyn’ rek nep, ginimin angak.” Angak kun ak, semb biyoñ mindip rek, ginimin angiy nup angak.

⁶Bi Gor nup simbonḡep yomb yimb chin Jiysis, bi Gor nup simbonḡep nindnimb gok, biynimb kuyip giyিংgipay rek ma gip; nuk bi nambnimb chin tep key yimb mindiy, Nop chinup minim kisenimb tep ak angiy, angayak rek gip.

⁷Pen minim nind angayak ak tep gombikop, minim kisenimb ak ma dand opkop. ⁸Biynimb gok mindrep ma giyak rek, Gor bi minim angep nuk gok kuyip, gos ñek minim tikiy angyak:

“Biyomb angip, ‘Kisen yand Yisrel-Jiwda biynimb kuyip, minim tep kisenimb angayningayn. ⁹Nusind nupis yes gok kuyip, ñin ar ay dand Yijip nimb winik ak pen, minim ang ar nokom ay angnuk ak ma niñeyak, kuyip kirginik. Minim kun ak rek, kuyip tip ak ma angningayn’ angak.”

¹⁰Pen minim bap angak:

“Kisen yand Yisrel biynimb gok yip, minim ang ar nokom ay, gos tep yand niñbiyn rek ak ñen, minim kil tikayey per mindek niñbay rek ak, niñningambay. Kun ak yand Gor Biyomb kiyk mindeningayn; kiyk biynimb yand mindeningambay. ¹¹Minim yip ak niñiy, biynimb yand ker mindeningambay kun ak, numiy numam biynimb gunap kuyip, “Kun kun giy niñnimimb angiy, ma angningambay. Biyn bi, kanj kayn mañgiysek, minim yip ak niñey tep gakñiñ, kisen giniñgambay ak mey, kuyip kun giy ma angningambay.

¹²Tap siy tap timey giniñgambay ak, kuyip simb niñiy kirginingayn ak mey, gos kun ak niñyiñ ma mindeningayn angak.”

¹³Pen minim kisenimb ay angak kun ak, minim nindnimb tip ak dakñiñ, minim nindnimb ak kurginiñḡ gisap.

Bi Simbonḡep Nindnimb Gok, Meymey Siypsiyp Likañ Ak Diy, Gor Nup Simbonḡ Ñiyiñgipay

9 ¹Gor minim nind angak ar ak, nup angñiñniñḡ, yikop angñiñniñḡiy rek ma ayak; kilrimey giy nep angñiñyiñgipay. Kun ak nuk angkek, ser korip bap man ar biy giyak. ²Ser korip kun ak, korip miñḡan omiñal gayak. Korip ñiluk miñḡan bap gay, korip miñḡan suñ-tep ak angyak. Miñḡan kun ak lam bap dañḡiy ay, bonḡ band bap gay, Gor nup simbonḡ ñinjun angiy, biret ak minek minek dam ayiñgipay bonḡ ar kun ak.

³Pen korip ñiluk miŋgan bap, chech yomb yimb ak pil giyak. Miŋgan kun ak, Gor korip ñiluk miŋgan suŋ-tep key yimb ak angyak. ⁴Miŋgan kun ak, mon boŋg band bap lak ayrep giy, gol di pik pis band ay maŋgiysek yiwgiy, tap kuyrep wip ak daŋgiyŋgipay ar kun ak. Pen kes gol diy giyak yomb bap, Gor minim kes won angyiŋgipay ak, kunep mindek. Miŋgan biyaŋ Gor low minim angyi tikak kamb pis omiŋal ak sek, binak Eron yir kondim dand taŋgiyŋgip gup gak ak sek, tap mana tiyn gol diy giyak miŋgan ak pareyak mindek ak sek ayey mindyiŋgip.

⁵Gor mindip biy angyi, kes won mindek ar ar siŋak, enjol rek omiŋal pil band sek pis pis gayak. Tap siy tap timey gipun rek, Gor niŋiy kirgaŋ angyi, likaŋ siskoy dap soŋgiyŋgipay namb kun ak. Tap kun gok minim ak, miŋiy parsek angyi tiknim rek ma ayip.

⁶Pen tap kun gok maŋgiysek gayey mindakniŋ, bi Gor nup simboŋgep gok minek minek, ser korip miŋgan suŋ-tep mis ar ak amiy, Gor nup woŋg ak giyiŋgipay. ⁷Pen bi Gor nup simboŋgep yikop kun gok, korip ñiluk miŋgan suŋ-tep key yimb biyaŋ amniŋgiy rek ma ayak. Simiy nokom nokom, Gor nup simboŋgep biyomb yimb ak, siypsiyp likaŋ dand nep, miŋgan kun ak amyŋgip. Tap siy tap timey nuk key gak gok sek, biynimb niŋrep ma giy, tap siy tap timey giyak gok sek Gor niŋiy kirgaŋ angyi, likaŋ ak dand miŋgan kun ak amiy, sinasin rek pikyiŋgip. ⁸Gak kun ak, Gor Kawnan ak chinup yomek niŋbun: ser korip miŋgan suŋ-tep mis ar ak tap gok mindakniŋ, korip ñiluk miŋgan suŋ-tep key yimb ak amiy, Gor nup anŋniŋniŋgiy rek ma ayak. ⁹Pen giyiŋgipay kun ak, Gor chinup biynimb miŋiy mindpun ñin biy gok, gosimb niŋniŋgiy angyi angak. Pen opriyŋ ñiyiŋgipay ak sek, meymey siypsiyp tap gok dand apiy, pik Gor nup simboŋgiyŋgipay ak sek kuyip gek, biynimb tep nuk mindeniŋgiy rek ma ayak. ¹⁰Ar kun ak giyiŋg angyiŋgipay, “Tap ak ñiŋemb; tap ak ma ñiŋemb; ñiŋg ak kun giy ñiŋemb; kun giy ma ñiŋemb. Ñin ñiŋg ay gilunŋ yokiy, kun ginimimb, yikop ak kun ma ginimimb angyiŋgipay.” Minim nindnimb niŋiy tap kilrimey giyiŋgipay kun ak; yikop minim kisenimb ak kond mindyiŋg, kawnan paŋg niŋiy gipay rek ak giyiŋgipay.

Jiysis Likaŋ Nuk Ak Key Diy Nop Nup Simboŋgñak

¹¹Pen Krays Gor minim kisenimb tep ak dand apiy, bi Gor nup simboŋgep yomb yimb chin ak mindiy, ser korip biynimb giyak man ar biy ma amnak: Nop ker yipund giy amnak. ¹²Chinup di Nop yip jimñen, perper mindeniŋgiy angyi, meymey kaw pikiy, likaŋ di Gor nup simboŋgiyŋgipay rek ma gak; likaŋ nuk ak key yowak rek, Nop nup simboŋgak. Pen bi Gor nup simboŋgep nindnimb gok minek minek, likaŋ soŋgiy simboŋgiyŋgipay rek ma gak: chinup di Nop yip jimñining, likaŋ nuk minek nokom yimb, dand Nop korip ñiluk suŋ-tep key yimb biyoŋ amek mey, perper mindenjun rek ayip.

¹³Nind biynimb tap siy tap timey giy, asiñ mindyngipay gok apey, bi Gor nup simbonḡep gok, meymey kaw tap gok pik likañ ak diy, kaw nemb marip bap mon dangiyey pisnep yin binj tikak band gunap diy, ñiḡ sek, likañ sek tuḡgandik mandik giy, mumbwak kuyip okok yokey, asdey pikiy suḡ ayiḡgip. ¹⁴Likañ yikop ak yokey, suḡ ayiḡgip kun ak; niḡind Kawnan perper mindeniḡamb ak, Jiysis bi suḡ-tep yimb ak yip mindiy, chinup nen aḡgiy kumek, likañ yowak ak; chinup gek, Gor biynimb suḡ-tep nuk gok mindiy, miñ apyap pikpay ar ak kirgiy, Gor Biyomb perper mindeniḡamb ak nup gosimb niḡiy, direp giḡniḡambun.

Krays Likañ Nuk Yowak Rek, Chinup Gor Yip Di Jimñiy Ayak

¹⁵Pen Krays bi nambnimb ak, Nop minim kisenimb ak dand apiy, chinup biynimb dinim aḡgiy aḡgayak gok, di Nop yip jimñiy ayip. Minim nindnimb ar ak mindakniḡ, mindrep ma giy mey; jimñiy mindep rek ma ayak ak pen; Krays kumak rek, Gor yip jimñiy mindiy, perper mindonjun rek ayip.

¹⁶⁻¹⁷Bi gunap minim kilis ak aḡgiy apay, “Yand kumen, tap yip gok apiyn rek biloknimimb aḡgey, minim kun ak niḡiy, yikop nep mindey mindey, pisnep kumey nep, apay rek bilokaypay. Kiyk kim mindyakniḡ, tap kuyip ma bilokaypay.” ¹⁸Kun ak rek, Gor minim nuk Jiwda biynimb kuyip aḡgak ak; meymey kaw pik likañ di sonḡey nep, wos gak.

¹⁹⁻²⁰Mosis Gor low minim aḡgek tikak gok, biynimb gok kuyip aḡñi day jiwiy, kaw ñiluk pik likañ diy, ñiḡ gunap sek sonḡiy, tap haysop apay alik kind ak diy, siyysiyp kas ak di day biyoḡ tiwñiḡiy, ñiḡ likañ kun ak tawiy, low minim buk kun ak sek, biynimb ap mindeyak gok sek yokey, asdey pikek aḡgak, “Likañ yoken nimbip asdey piksap kun biy, Gor minim ak pisnep niḡdiniḡambun aḡgiy gispiyn aḡgak.” ²¹Pen ñiḡ likañ gunap diy, Gor aḡgniḡep ser korip ak yokey, asdey pikiy, diys tap yerip yerip mindek korip kun ak, asdey pikiy gak. ²²Minim nindnimb ar ak tap maḡgiysek rek, Gor niḡek tep ma gak; likañ diyoyekey, asdey pikek nep, niḡek tep giyḡgip. Biynimb tap siy tap timey gey, yikop niḡiy ma kirgak; siyysiyp gok pikey likañ yapek, dap simbonḡ geyak mey; tep aḡgiy, niḡiy kirgak.

Krays Chinup Aḡgiy Kumiy, Gach Chinup Wiykyokip

²³Tap kilrimey ser korip man ar biy giyḡgipay kun gok, Gor nuk key gip rek, biynimb gok niḡniḡiy aḡgiy, aḡgek giyḡgipay. Jiysis tap yikop kiyk pik simbonḡiyḡgipay kun gok nep, miñmon tep biyoḡ gombikop, yergiy tep gipkop. Kun ak nuk simbonḡiyḡn aḡgiy, key yimb ar ak gak. ²⁴Nuk key kumiy tip ak tikjakiy, Gor aḡgniḡep korip biynimb giyak miḡgan ak ma amnak; Nop ker yipund giy amiy, tap siy tap timey gipun rek, chinup nen Nop nup aḡgniḡ mindip. ²⁵⁻²⁶Yisrel bi Gor nup simbonḡep yomb

yimb gok, simiy nokom nokom, likañ kiyk key mer, siypsiyp tap gok pikiy likañ diy, Gor nup simbonḡning, korip ñiluk suḡ-tep key yimb miḡnan ak amyiḡgipay. Pen Krays ar kun ak rek gipkop ak, wosrey miḡmon alwol gayak ñin ak tikiy, mind dand apiy mindpun ñin biy, per simiy gok simiy gok chinup aḡgiy, yiwur diy kumbikop. Pen ñin tapin pandikip ñin biy, biynimb mindyiḡgipay gok, mindpun gok, mindeniḡgambay gok tap siy tap timey gach ak, minek nokom yimb chinup maḡgiyseḡ aḡgiy kumak.

²⁷Biynimb gok minek nokom yimb kumiy, kisen kor yomb ak niḡbay rek, ²⁸Krays biynimb nokom nokom maḡgiyseḡ timey gipay rek, minek nokom yimb kumiy, tip ak tikjakak. Chinup aḡgiy ñin nokom kumak ak, kisen tip ak ma kumniḡgamb. Pen tip andkind winiḡgamb ñin ak, biynimb tap siy tap timey gipay gok kuyip, simbonḡ giyn aḡgiy ma winiḡgamb; biynimb nup tep gaksiḡ kond mindpay gok kuyip, pisnep diniḡ winiḡgamb.

Simbonḡep Nindnimb Ak Gach Ma Wiykniḡgamb

10 ¹⁻²Jiwda low niḡiy, siypsiyp tap gok pik simbonḡyiḡgipay ak, yikop kisen giniḡgamb rek, kawnan paḡḡ niḡiy gipay rek giyiḡgipay. Giyiḡgipay kun gok, simiy ak simiy ak per giyiḡgipay ak pen; mindrep giniḡgiy rek ma ayak. Kisen giyak ñin ak, kuyip gek pisnep suḡ-tep mindembiyap ak; gos kuḡay niḡiy, tip ak giy tip ak giy ma gipyap. ³⁻⁴Pen tap siy tap timey gipun ak, siypsiyp tap gok pikon likañ yapek, Gor niḡiy ma kirginimuḡ rek ayip aḡgiy, simiy ak simiy ak simbonḡyiḡg nep mindyiḡgipay. Minek minek simbonḡyiḡgipay kun ak, gos yomb amnak tap siy tap timey giy, mindrep ma giyak ar ak.

⁵⁻⁶Kun gek, Krays man ar biy winiḡ, Nop nup aḡgak,

“Tap pik likañ yapek simbonḡgipay ak, nip tep ma gip. Pen tap kun gok daḡgiyey pisnep yin binj tikip ak, kunep nip tep ma gip rek, mumbwak yip bap gaynak. ⁷Gayenak, yand nip aḡgnik, ‘Bapiy, Yip mumbwak gayey, wosrey buk tikiy aḡgyak rek opiyn ak; aḡḡniḡgamban rek giniḡgayn aḡgnik’ aḡgak.”

⁸Krays minim kun ak omiḡal aḡgak. Minim bap ak aḡgak, “Bapiy. Biynimb nip simbonḡning, kanj siypsiyp tap gok pikey likañ yapek akaḡ, pisnep daḡgiyey simbok amek, nip tep ma gip aḡgak.” Low buk tikiy ginimimb aḡgyak rek, simbonḡniḡgambay ak pen; Nop nup tep ma giniḡgamb aḡgak. ⁹Pen minim bap aḡgak, “Bapiy. Nip kond mindpiyn. Yip yerip aḡḡniḡgamban ak, aḡḡniḡgamban rek giniḡgayn aḡgak.”

Ñinuk minim kun ak aḡgek, Nop minim nindnimb siypsiyp tap gok pik simbonḡyiḡgipay ak kirgiy, minim tep kisen aḡgak ak gek wos amimb. ¹⁰Kun ak Krays Nop minim ak niḡiy, tap siy tap timey gipun gach ak wiykyokniḡ, minek nokom yimb pisnep simbonḡgak ak mey; chin biynimb nuk gok suḡ-tep mindpun.

Krays Kumak Ar Ak Nep, Gach Wiykyokningamb

¹¹Bi Gor nup simbonḡep yikop gok, tap siy tap timey gipun ak, Gor niḡiy kirgaḡ angiy, minek minek tap pik simbonḡipay ak pen; ar kun ak gey, Gor niḡiy pisnep kirginimuḡ rek ma ayip.

¹²⁻¹³Pen Bi Gor nup simbonḡep aspun ak, Bapiy biynimb tap siy tap timey gipay ak niḡiy kirginimuḡ rek aynimuḡ angiy, ḡin nokom yimb kumiḡ, woḡḡ kun ak gi dipiḡn angiy, am Nop ḡin yipund kind okok ken bisgak.

¹⁴Yenen: nuk ḡin nokom yimb kumak rek, biynimb nuk suḡ-tep mindeyaḡ angiy dip gok, Gor dinimuḡ rek ayip. ¹⁵Gor Kawnan ak kunep, chinup minim kun ak rek angḡimb. Nuk biynimb gos ḡek, Baybol buk ak tikiḡ, minim kun ak rek angiy angyak:

¹⁶“Biyomb angip, ‘Kisen yand giniḡgayn ak: kiy yip minim ang ar nokom ay, jimḡiy mindiy mey; low yand gok gosimb namb kuyip biyaḡ tikayen kisen giḡḡḡ, sakiḡ ma giniḡgambay’ angip angyak.”

¹⁷Pen minim bap angak, “Low yip timbrikiḡ, tap siy tap timey giyak ak niḡiy kirgiḡ, tip ak ma niḡḡḡgayn angak.”

¹⁸Niḡiy pisnep kirginiḡgamb kun ak, nuk yip jimḡiy mindiy mey; tap pik dand apiḡ simbonḡḡiḡḡipay rek, tip ak ma giniḡgambun.

Gor Nup Chiḡḡrep Giy Maḡ Winjun

¹⁹⁻²⁰Kun ak mam ay sikop, gos kuḡay ma niḡjun. Jiḡis chinup angiy mumbwak nup timey gey kumek, laplap yomb korip ḡiluk miḡḡan suḡ-tep key yimb pil giyak ak puḡḡrikiḡ, kiḡḡḡ pisnep yikak.

²¹⁻²²Pen kunep, nuk bi Gor nup simbonḡep yomb yimb chin ak mindiy, Gor nup simbonḡip rek, nup gosimb niḡiy, mindip maḡ siḡak winjun. Chinup gos yomb ma niḡyaḡ angiy, Niḡuk nup yokek apiḡ kumek, likaḡ nuk yowak rek, chinup ḡiḡḡ yomb rek pikek mey, biynimb nuk mindpun.

²³Kun ak Gor minim chinup angayek niḡnuk ak, ma kirginjun, chinup diniḡgamb angiy, gos sek kond mindenjun. ²⁴Pen biynimb gunap kuyip simb niḡiy don, kiy pen biynimb gunap kuyip simb niḡiy dey, penpen wasemb ay penpen diy mey, maḡḡiysek mindrep giniḡgambun.

²⁵Biynimb gunap Gor minim niḡjun angiy, ap nan-giḡḡḡipay ak pen; kisen kirpay rek ma ginjun; maḡ mindip Jiḡis winiḡgamb angiy ap nan-giḡḡḡ, minim niḡbun ak penpen angḡiḡḡḡ, mindrep ginimimb.

Jiḡis Nup Kirginiḡgambun Ak, Pisnep Apyap Pikniḡgambun

²⁶Yenen: Krays minim yipul yimb ak angḡey niḡ-tep giy, pen andkind tap siy tap timey ar ak amiḡ, tap Gor nup pik simbonḡon, chinup dinimuḡ rek bap ma mindeniḡgamb. ²⁷Ar kun ak, kiḡḡḡ chin bap ma mindeniḡgamb; niḡḡind nup pirikniḡgambun. Kor ak sek, mon maḡḡaḡ biynimb nup miluk

niñeningambay kuyip sinj timey yinimb ak sek kond mindoningambun. ²⁸Biynimb Mosis low tikak gok niñiy, tap yikop rek ayek timbriyak gok; biynimb omiñal akañ, omiñal nokom windin niñey, kor giyিংgipay ñin ak, kuyip simb niñnimuñ rek ma ayek, biyomb gok minim kun ak niñrep giy, aņgey pisnep pik ayiņgipay. ²⁹Kun ak chin Gor Ñinuk ak nup alemb alemb ñiningambun ak, yergiy kim amningambun. Nup alemb ñiningambun kun ak, likañ tep chinup Gor yip di jimñiy aynim aņgiy gek yowak ak, tap yikop rek ayek, kun giniņgambun. Pen Gor Kawnan chinup simb niñimb ak, nup kunep timey giniņgambun. ³⁰Gor nuk key aņgak, “Biynimb timey gipay gok, yand nokom, kuyip pen timey giniņgayn aņgak.” Pen minim bap aņgak, “Biyomb ak nuk key, biynimb nuk gok kuyip kor niñiy, minim aņgningamb aņgak.” ³¹Pen Gor biyomb yimb perper mindip ak, biynimb gok kor geniņgamb; niñind jel giniņgamb.

Gor Aņgip Rek Gon Amnimuñ

³²Pen nind giyিংgipim ak sakiy ma ginimimb. Gor melik tep niñiy denbik, biynimb nimb gok nimbip miker yomb ñiyak ak pen; nup ma kirpik. ³³Ñin gunap nimbip minim timey aņgiy, timey giyিংgipay ak pen; gos kun ak ma niñiy, biynimb wikan gunap kuyip timey giyakniñ, kun okok ken amyiņgipim. ³⁴Biynimb Gor nup gosimb ak niñey, kalambis ayak gok, simb niñyিংgipim. Ap tap nimbip maņgiysek dand okok nimb okok nimb gey, “Ak tap yikop; gos chin ak amimb Gor tip chinup gayek, perper mindeningambun biyoñ aņgiy,” gos yomb kun ak ma niñbik. ³⁵Kun ak sisiñ ma aynimimb; Gor nup nokom gosimb ak niñmindiy mey, perper mindeningambim. ³⁶Nup ma kirgiy; aņgip rek gon amek mey, aņgak rek chinup giniņgamb. ³⁷Baybol buk ak tikiy aņgyak:

“Bi winiņgamb ak per ma mindeningamb; mañ mindip winiņgamb.

³⁸Biynimb suñ-tep yand gok, yip gosimb niñmindeningambay ak pen; gunap yip kirgey, tep ma giniņgamb aņgyak.”

³⁹Pen chin biynimb Gor nup kirgiy, apyap pikpay gunap ma mindpun; biynimb nup gosimb niñiy, perper mindeningambay gok mindpun.

11 ¹Gor nup windin ma niñbay ak pen, biynimb nup gosimb niñbay gok, mindip aņgiy niñrep yimb gipay. Nup gosimb niñiy mey, chinup kond mindeningamb aņgiy, nup gos sek kond mindpay. ²Biynimb wosrey kay, nup gosimb niñyak rek, kuyip aņgak, “Nimbip niñen yip tep gip aņgak.”

³Nup niñind aņgip aņgiy gosimb niñbay ak mey; tap semb biyoñ, tap man biy, tap bap diy ma gayak, minim anep aņgek ayak ak niñbun.

Ebol, Yinok, Nowa Gor Nup Gosimb Niñyak

⁴Wosrey binak Ebol Gor nup gosimb niñiy, minim aņgip gok niñind aņgip aņgiy mey, tap dand apiy pik simboņgñek, Gor niñek tep gak. Pen numam Keyn tap dand apiy simboņgñak ak, Gor niñek tep ma gak.

Ebol Gor nup gosimb niñiy, niñind aᅅgip aᅅgek mey, nup pen bi suᅅ-tep yand aᅅgiy, tap simboᅅᅅᅅak ak niñiy, yip tep gip aᅅgak. Ebol kumiy amek, miñiy yip ma mindpun ak pen, nuk Gor nup gosimb niᅅak kesim kun ak, chinup biynimb gunap gos niᅅiyᅅ nep mindip.

⁵⁻⁶Biynimb Gor nup gosimb niᅅbay gok nep, nuk yip jimñiy mindeniᅅgiy rek ayip. Yenen: nuk biynimb yikop ma diniᅅgamb; biynimb, nuk mindip ak mey nup aᅅᅅniᅅon, chinup minim aᅅgayip rek giniᅅgamb aᅅgiy niᅅbay gok nep diniᅅgamb. Yinok nuk bi kun ak rek. Gor nup gosimb niᅅmind dand amiy ma kumak, Gor nup dand amek mey; nup piyowiy ma yimb niᅅyak. Baybol buk ak tikiy aᅅgyak, “Gor Yinok nup niᅅek tep gek, dand amnak aᅅgyak.”

⁷Gor Nowa nup kunep: miñmon yomb pikniᅅgamb aᅅgek, windin ma niᅅak ak pen, Gor nup gosimb niᅅak rek niñind aᅅgip aᅅgiy, siyip yomb ak gak. Siyip yomb kun ak giy, biyn nuk ñapan nuk gok maᅅgiysek miᅅᅅan kun ak amdey, miñmon yomb yimb ak pikek mindrep giyak. Pen miñmon pikniᅅgamb aᅅgek, windin ma niᅅak ñin ak, Gor aᅅgip ak niñind aᅅgip aᅅgiy, gek amek mey, nuk kim amnakiᅅ, biynimb yikop gok, Gor nup minim bap pen aᅅᅅniᅅgiy rek ma ayak.

Ebrahim

⁸Basind yes Ebrahim kunep, Gor nup gosimb niñiy, aᅅgak rek gak. Nop miñmon ak mindakniᅅ Gor aᅅgak, “Ñapan nand tikenᅅᅅamban tikey amniᅅgamb gok, nimbip miñmon yomb bap pisnep aᅅᅅniᅅgayn ak mey; am kun okok mindenimin aᅅgak.” Aᅅgek, miñmon kun ak mindip okok aᅅgiy ma niᅅak; yip kond mindeniᅅgamb aᅅgiy, monmon amnak. ⁹Pen am mindek kun ak miñmon nuk mer, biynimb gunap miñmon kiyk. Nuk kun giy mindiy, ser korip nep giy kin taᅅgiy, ñinuk Aysek nup tikak. Tikek yomb giy, nop gak rek nep gak. Aysek ñinuk Jekop nup tikek yomb giy, kunep gak. ¹⁰Gor miñmon kilis-tep per mindeniᅅgamb aᅅgiy gayak ak, am mindoniᅅgambun aᅅgiy, Gor nup gosimb niñiy, ser korip nep giy kin taᅅyiᅅᅅipay.

¹¹Pen Ebrahim biynuk Sera tokiy yimb ay, Gor aᅅgip rek chirup giniᅅgamb aᅅgiy, nup gosimb niᅅmindiy, ñi Aysek nup tikrik. ¹²Ñapan nuk kun ak tikek, tik dand amiy apiy giy; gap, kamb kilup, tap okok kuᅅay yimb mindek, ma ñin paᅅᅅniᅅbay rek ak tikyak.

¹³Bi wosrey aspun kun gok, Gor kuyip yerip yerip aᅅgek, aᅅgak rek nep chinup giniᅅgamb aᅅgiy, nup gosimb niᅅmindeyak ak pen; aᅅgak kun ak gek niñiy, ma kumyak. Pen gos yomb kun ak ma niᅅyak, miñmon nuk amiy niᅅniᅅgambun aᅅgiy, tep gakniᅅ mindiy kumyak. Lum ar biy mindiy aᅅyiᅅᅅipay, “Chin biynimb key okok nimb gok, yikop ap namb biy mindpun aᅅyiᅅᅅipay.” ¹⁴Biynimb minim kun ak rek apay gok, miñmon chin yipund giy bap mindip ak aᅅgiy niñiy, kun apay.

15-16 Miñmon kiyk kiring wiyak ak gos amek, andkind ambiyap ak pen; gos yomb kiyk amnak Gor miñmon tep biyoŋ. Nuk pen dawin yomb ak gayrep giy, biynimb kun gok rek kond mindip ak mey; biynimb kun gok rek nup Biyomb Gor chin apay ak, nuk niŋek tep yimb gip.

17-19 Pen Gor, Ebrahim aŋgningayn rek giningamb akan aŋgiy, nup aŋgak, “Ni nand Aysek tikek tikey amiy apiy giy, kuŋay mindeningambay aŋgnik ak, nup dam pikay, yip simbong ñinimin aŋgak.” Aŋgek, Ebrahim Gor nup gosimb niŋiy aŋgak, “Ñapan yand kun ak tikek tikey amiy apiy giy, kuŋay mindeningambay aŋgak minim ak ma kirginingamb; ñiyand nokom yimb ak pik ayen, nuk gek tip tikjakningamb aŋgiy,” ñinuk Aysek nup dam bind ar ak tiwning ay, ñayip diy piŋiy aŋning gek, Gor kun ma ginimin aŋgak. Kun ak ñinuk Aysek nup pisnep kumak rek ayak ak pen, nup kim diy dand andkind amnak.

20 Aysek pen yomb giy, ñi omiŋal tikak. Ñi bap yimb ak Jekop; ñi bap yimb ak Yisow. Pen nop Aysek tokiy yimb ay, Gor aŋgip rek giningamb aŋgiy, ñinuk omiŋal kuyip tap yerip kisen giningamb minim tep ak, gunap nind aŋgñak. Kumek kisen aŋgak rek nep gak.

21 Pen ñinuk Jekop tokiy yimb ay, Gor nup gosimb niŋiy, aŋgip rek giningamb aŋgiy, ñinuk Josep ñi tikak omiŋal ak kuyip, Gor nirip kond mindyng, kun kun giningamb aŋgiy aŋgiy, yir kondim ak diy, jiy kuyangiy mindyng, kuyipmiŋay Gor minim tep kun ak, gunap nind aŋgñak. Kumek kisen aŋgak rek nep gak.

22 Ñinuk Josep pen tokiy yimb ay, Gor nup gosimb niŋiy, giningamb rek niŋrep giy, minim gunap kunep aŋgak. Biynimb nuk gok kuyip aŋgak, “Kisen miñmon Yijip biy kirgiy, andkind miñmon Keynan amningambim. Ñin kun ak, tiŋiy yip gok sek dand amiy, kaw dinimimb kun okok aŋgak.” Aŋgiy, kumek kisen mey, kuyip aŋgak rek maŋgiysek giyak.

Mosis Nup Tik Weygirik

23 Mosis nonim nop ber kunep, Gor nup gosimb niŋiy, chinup kond mindeningamb aŋgiy, Yijip biyomb Perow nup ma piririk. Ni tep Mosis nup tikiy, takin omiŋal nokom weyger mindek. Pen kisen Perow panuk ap Mosis nup dand amiy, biyn bap key ñispiyn aŋgiy nonim nup ak key ñek, tiy ñiyngip. 24 Mosis yomb giy, nuk kunep Gor nup gosimb niŋiy, yip kond mindeningamb aŋgiy aŋgak, “Yip Perow panuk ñinuk ma aŋgningiy. 25-26 Lum ar biy tap siy tap timey giyng minden, yip tep ma giningamb; perper mindenim aŋgiy, krays nup chinggen, yip aŋgiwningambay ak tep yimb; pen Yijip biynimb amemb owep tap tep tep kiyk gok, yip tep ma gip aŋgak. Yand biynimb Gor ker mindey timey gipay gok, yip yiŋgong giy mindenim aŋgak.”

27 Pen Mosis Bi windin ma niŋbun ak nup gosimb niŋiy mey; miseŋ niŋnimuŋ rek ayek, kiyŋ Perow nup miluk niŋak ak ma pirikak; Gor

angak rek giy, Yisrel biynimb kuyip poḅind Keynan amnak. ²⁸Pen nuk Gor nup gosimb niḅiy anḅek, Yisrel biynimb Pasopa siypsiyp ḅiluk gok pikiy likaḅ diy kinḅeḅrumb pis pis pikiy, day ar biyoḅ sek pikey, enjol ap Yijip biynimb ḅi nind tikyak gok maḅiysek pikayniḅ, Yisrel biynimb korip kuyip ak ma awak.

²⁹Yisrel biynimb Gor nup gosimb niḅey, Yijip kay kuyip wirsek yukey, am ḅiḅ solwara Likaḅ ak tikniḅ giyakniḅ, Gor gek ḅiḅ kun ak liḅ pis pis amek, lum ar ak amiy, kind bindoḅ amniyak. Pen Yijip kay kuyip yuk dand namb kun ak apeyak, ḅiḅ ap kuyip yiw gek maḅiysek kumdiyak.

³⁰Kisen Yisrel biynimb Gor nup gosimb niḅiy, am dawin yomb Jeriykow kamb wariy kilis ak, ḅin onep ar ak kus kus gey gey pisnep wakanjsakak.

³¹Pen kesim ar nokom kun ak nep, kinḅeḅram biyn Reyap miḅmon Jeriykow nimb ak, Gor nup gosimb niḅiy, biynimb Gor nup minim kirgiyak gok yip ma kumak. Yenen: bi Yisrel omiḅal miḅmon Jeriykow amer, kuyipmiḅay pikayniḅ gey, Gor nep anḅek miḅmon chinup niḅayniḅ opiyr anḅiy, di kasin gek, kim mindiy andkind amnirik.

³²Pen biynimb Gor nup gosimb niḅey, kuyip key yimb gak kesim gok, yergiy parsek anḅnim. Binak Giydiyon, Barak, Samson, Jepta, Depiyt, Samwel bi gok sek, bi Gor minim anḅep gok sek giyak giyak rek anḅen, minim paryomb amniḅamb. ³³Biyn bi kun gok: gunap Gor nup gosimb niḅiy, biynimb miḅmon key gunap kuyip yuk yokyak; gunap minim yomb gok Gor gos tep niḅimb rek tuḅgasikyak; gunap kuyip kayn ayndik layon mindeyak namb ak diyokeyak, Gor kuyip kond mindek ma siwyak; gunap Gor kuyip minim anḅek, anḅip rek giniḅamb anḅiy kond mindey mindey, anḅak rek nep gak. ³⁴Pen gunap mon yomb yinek namb ak diyokeyak ma yinak; gunap baynat diy kuyip piḅiy ayun anḅyak ak pen; kuyip piḅiy ayniḅiy rek ma ayak. Biynimb kun gok biynimb sayn ak pen; kuyip kond mindek kilisimey yimb mindeyak. Penpen giyiḅ, amiy biyomb miḅmon okok nimb gok kuyip, yuk yokyak. ³⁵Biyn gunap ḅapan kiyk gok kumeyak, Gor nup gosimb niḅey, gek tip ak tikjakyak.

Biynimb gunap Gor nup gosimb niḅyak rek, kuyip miḅ ayeḅ kumyak. Gor nup kirgembiyap, kuyip wisik yokey ambiyap ak pen; perper mindenjun anḅiy, Gor nup chinḅiy nep mindeyak rek, kuyip timey gey gey kumyak. ³⁶Gunap kuyip anḅjiwiḅ, tapin pikyak. Gunap tiwniḅiy, kalambis yokyak. ³⁷Gunap kamb silok pikayey kumyak; gunap kuyip sow diy timbrik day day ayak. Gunap baynat diy, kuyip pisnep piḅiy ayak. Gunap kuyip yukyok gey gey kosyam mindiy, simbgeprek meymeḅ siypsiyp wak diy, chech rek yimiy giranḅyḅipay. ³⁸Pen biynimb yikop gok, biynimb tep kun gok kuyip, chin yip mindep rek ma ayip anḅiy, kuyip timey gey gey, pirik am miḅmon nep namb okok mindiy, kamb miḅgan man miḅgan okok kin tanḅyḅipay.

³⁹Biyimb aspun kun gok, Gor nup gosimb niñiy mind tep yimb giyak ak pen; kuyip direp giniñgayn aṅgak rek, ñin kun ak ma gak. ⁴⁰Yenen! Chinup kunep diniñ, niñayak rek, ñin nokom kun ak nep mañgiysek den, am jimñiy mindrep giniñgiy aṅgiy niñak.

12 ¹Kun ak biynimb kuñaynep chinup piñiy kus kus giy, kinjeñ tep yomsipay ak; tap gos yomb niñbun gok kirgiy, tap siy tap timey chinup kasek chinginiñmuñ rek ayip ak kirgiy, kinjeñ tep yomsipay ak dinjun. Kinjeñ tep ar kun ak, kosyam amniñgambun aṅgiy, gos ak ma niñjun. ²Biyomb chin Jiysis nup gosimb niñiy, nuk gip rek ginjun. Nup ñaṅgrimbikayniñ gey, yip bi timey rek ñaṅgbirikayey nambiñ diniñgayn aṅgiy ma aṅgak, biynimb gok kuyip aṅgiy kumiy, Bapiy ñin yipund kind okok ken am mindeniñgayn aṅgiy, nup tep yimb gak.

Gor Chinup Mindrep Giyañ Aṅgiy, Miker Gunap Ñimb

³Biyimb kuñaynep nup miluk niñiy, timey giy gey amek, ma pirikak. Chin gak ar kun ak, kunep ginjun. ⁴Nuk mey, chinup suñ-tep mindeniñgiy aṅgiy kumak. Nimb pen, tap siy tap timey ma giy, nup chingiy nep mindonjun aṅgiy, miker yomb kun ak rek ma dipik. ⁵Gor nimbip ñapan yand aṅgiy, minim tep aṅgek tikyak ak, sakiy gipim rek ayip. Nuk aṅgak:

“Ñapan yand guniy! Biyomb ak nimbip gos winjkiyñg miker ñiniñgamb ak; gos yomb ma niñnimimb. Tap siy tap timey gem, nimbip aṅg giniñgamb ak, chinup pisnep kirgip aṅgiy, gos kuñay ma niñnimimb. ⁶Biyimb nup tep gip ak, ñapan nuk gok mey, kuyip per gos winjkip aṅgak.”

⁷Kun ak kosyam mindeniñgambim ak, gos kuñay ma niñnimimb; Bapiy chinup gos winjksap aṅgnimimb. ⁸Pen nimbip timund ma winjkip aṅgiy; biynimb nop sek ma mindpim gok mey kun gip. ⁹Bapiy chin man ar biy gok, chinup timund winjikey, tep winjkipay aṅgiy niñbun. Kun ak rek, Bapiy chin semb biyoñ timund winjikek, tep yimb kun gip aṅgiy niñjun.

¹⁰Bapiy chin man ar biy timund winjkipay gok, sikoy won bap mindeyañ aṅgiy, gos key niñiy timund winjkipay. Pen Bapiy yomb chin semb biyoñ chinup gosimb niñiy, suñ-tep mindpiyn rek nep mindeyañ aṅgiy gos winjkip ak; aṅgip rek ginjun. ¹¹Chinup timund winjkip won ak, tep ma gip ak pen, timund winjikek suñ-tep mindiy mey; kapkap mindrep giyiñg gon amniñgamb.

Gos Wos Niñiy Gon Amniñmuñ

¹²Ñin tomb sayn gi yowip ak; yikop gip aṅgiy, tikjak amiy apiy gem kilis ginimū. ¹³Kinjeñ yipund giy tep tep ar ak amem, gunap tomb puṅgjiwonimū, kilis giy am gem gem, suñ ayniñgamb.

¹⁴Biyimb gok yip mañgiysek jimñiy mindenjun aṅgiy mindenimimb ak pen; Gor biynimb suñ-tep nuk mindenimimb. Biynimb suñ-tep gok nep, Biyomb chin ak nup niñniñgambay.

¹⁵Kun ak niṅrep ginimimb. Biynimb nimb gunap, Biyomb chinup simb niṅiy dip ak nup, kirginiṅiy rek ayip. Pen biynimb mindrep giniṅgambay gok, biynimb mindrep ma gipay namb ak mindey, kuyip asiṅ wilikniṅgamb. ¹⁶Pen biynimb nimb gunap biyn siy bi siy giy, Gor nup kirginiṅiy rek ayip. Giniṅgambay kun ak, Yisow wosrey gak rek giniṅgambay. Nup yiwān gek, tap ṅiṅiyān aṅgiy, Gor nop Aysek bilesiyṅ tep ṅek ṅinuk nup ṅiniṅ gak ak, tap yikop rek ayek kirgiy, tap keṅmaṅgiy won ak nep ṅiṅemb ak dak. ¹⁷Pen nimb niṅbim: kisen nop tap ṅiniṅ gak kun ak tip diyān aṅgiy, kinjeṅ dinimuṅ bap ma mindek, simb gek siy aṅgak.

Gor Miṅmon Tep Nuk Sayon Amjipun

¹⁸Yisrel biynimb miṅmon Saynay dum ak am mindey, Gor minim nuk nind aṅgayak ak, Mosis nup aṅgakniṅ, mon yomb yimb yiniy, kisyim jimbenjimb apiy, yingen yomb apiy gak. ¹⁹Pen biykul yomb ak aṅgiy, minim semb biyoṅ nimb gunap aṅgek, biynimb gok pirikiy, Mosis nup aṅgyak, “Minim asap kun ak rek, tip ak aṅgek ma niṅjun aṅgyak.” ²⁰Yenen: Gor kuyip aṅgak, “Biynimb, meymey, siypsiyp tap gok yirik kun ak ameniṅgiy, kamb silok pisnep pik ayep aṅgak.” ²¹Kiyk minim niṅiy pirikyak kun ak, Mosis kunep niṅiy jep diy pirikak.

²²Kiyk miṅmon dum amniyak kun ak; miṅmon nep dum ak amniyak. Nimb Biyomb permindep minim nup kisenimb aṅgayip ak dipim gok, enjol kuṅay yimb nep tep gakniṅ, mindpay miṅmon Sayon dum opim ak mey, Jerusalem semb biyoṅ ak opim.

²³Pen Biyomb biynimb maṅgiyseṅ bilokniṅgamb ak, yimb nimbip ak biynimb nuk nindnimb gok sek tikayek mindip. Biynimb kun gok kumiy ma kurgiyak, am nuk yip mindrep yimb gipay. ²⁴Kun ak minim kisenimb ak niṅiy, Jiysis ker opim ak tep gipim. Keyn numam Ebol nup pikek likaṅ yowak ak, minim yomb yimb dak; pen Jiysis likaṅ ak chinup nen aṅgiy yowak rek, Gor yip jimṅiy mindonjun rek ayip.

Niṅrep Ginimimb

²⁵Kun ak niṅrep ginjun. Biynimb Saynay dum mindiy, minim aṅgek ma niṅyak gok, kim amniṅgiy rek ma ayak ak, minim nuk kisenimb ak kirginiṅgambun; chinup yerip rek giniṅgamb.

²⁶ṅin kun ak kuyip minim aṅgakniṅ, monmon rek dak. Pen chinup aṅgak, “Kisen kun ak rek gen; tap mankumb biy, semb biyoṅ maṅgiyseṅ kawin kawin giniṅgamb aṅgak.” ²⁷Giniṅgamb aṅgak kun ak, tap per ma mindeniṅgamb aṅgiy gayak gok, maṅgiyseṅ kurginiṅgamb; tap perper mindeniṅgamb aṅgak gok nep mindeniṅgamb. ²⁸Tip chinup aṅgayip ak, kawin ma giy mindnep mindeniṅgamb kun ak, nup gosimb niṅiy, tep gakniṅ yimb nup dand aranjun. ²⁹Biyomb chin mon rek yinimb ak; niṅrep ginjun.

Mam Ay Gunap Kuyip Wasemb Yimb Ayjun

13 ¹Mam ay gok yip penpen wasemb aying nep mindenimimb. ²Biynimb okok nimbip ker apeningiy, kuyip dinimimb. Biynimb gunap, biynimb yikop gok wasiw angdispun angiy, enjol gunap kuyip wasiw ang diyak. ³Mam ay gunap kalambis mindeningiy, chin yip kalambis mindpun angiy niñnimimb. Mam ay gunap kosyam mindeningiy, chin yip kosyam mindpun angiy niñnimimb. ⁴Biyn bi dipay ak tep gipay. Biynimb gunap ap bi beriyimay minim pisnep apay kun ak, ma timbrikningiy. Gor biynimb biyn bi diy, kisen biyn siy bi siy giningambay gok sek, biynimb yikop biyn siy bi siy giningambay gok sek minim yomb yimb angningamb. ⁵Tap chin dipun gok sikoy gip angiy, gur-maniy tap gok gos yomb ak ma niñjun. Gor angak, “Nimbip sakiy ma giningayn; nimb yip nep mindeningayn angak.” ⁶Kun ak gos okok gunap ma niñjun. Biyomb chinup kond mindip rek, biynimb gunap chinup yergiy timey giningambay angiy, ma pirikjun.

Minim Biyomb Nimbip Angey Niñbik Ak, Sakiy Ma Ginimimb

⁷Biyomb nimbip minim tep angey niñbik gok, Gor nup gosimb niñiy, gey amek tep gak ak niñbim. Ar nokom kun ak nep ginimimb. ⁸Jiysis gumon wos rek ak perper yimb mindip. ⁹Nuk chinup simb niñiy dip rek, Gor biynimb tep nuk mindpun. Biynimb gunap minim key angeningiy ma niñjun. Biynimb kun gok tap ak niñjemb, tap ak ma niñjemb angiy, asik mosik gi mindpay ak pen; tap kun gok gek mindrep ma giningambay. ¹⁰Bi Gor nup simbonjep makaw meymey pik simbonjep gi mindpay gok; ar kun ak nep gey amek, Jiysis chinup nen angiy kumiy, tap niñjemb nuk yimb chinup niimb ak; kuyip niñimuñ rek ma ayip. ¹¹Kiyk makaw meymey pikiy likañ gok, dam Gor nup simbonjep biyomb yimb ak nup ñey, nuk pen biynimb tap siy tap timey gipay rek, dam Gor korip ñiluk miñgan suñ-tep key ak songip. Nonim gok pen dam, mindpay mis ar siñak dangiyey pisnep yin simbok amimb. ¹²Kun ak rek, Jiysis biynimb nuk gok suñ-tep mindeyay angiy, miñmon yomb Jerusalem mis ar ak amiy yiwur yomb diy, likañ yapek kumak. ¹³Nup kisen ginjun angiy niñbun rek, biynimb yikop gok gey amimb ar ak kirgiy, nup ker mis ar ak amon, chinup nup angjiwyak rek monmon angjiwningiy. ¹⁴Yenen: man ar biy, perper mindonjun tip bap ma mindip ak pen; miñmon kun ak rek mindonjun angiy kond mindpun. ¹⁵Nind Gor nup meymey, kaw tap gok pik simbonjyngipay ak pen; miñiy Jiysis ap chinup angiy kumak rek, tap kun gok ma pikniñingambun. Nup tep ginimuñ angiy, meñg miñgan dand araniy, yimb nup ak per dand aranjun. ¹⁶Pen gos sek mindiy, biynimb direp

giyɨŋ, opriyŋ ñimbay rek, tap penpen bilok ñinjun. Ar kun ak gon mey, Gor nup tep giniŋgamb.

¹⁷Biyomb nimbip Gor minim apay gok, gos peyiŋ niŋiy ma apay, woŋg gipun ak Gor niŋek tep giniŋgamb aŋgiy, gos ak niŋyiŋ gipay. Kun ak nimb siskoy diy, apay rek ginimimb. Kun geniŋgambim, tep gakniŋ woŋg giniŋgambay. Mer ak, nimbip yergiy kond mindrep giniŋgambay?

Gor Nup Aŋgniŋem Chinup Kond Mindonimuŋ

¹⁸Pen Gor nup aŋgniŋem, chinup kond mindonimuŋ. Gor yip mindrep giy gos par ayiŋ ma mindpun ak pen, per kun ak rek nep ginjun aŋgiy mindpun. ¹⁹Gor nup aŋgniŋem, yip kond mindakniŋ, mindpim ak kasek ninim.

²⁰Gor bi tep biynimb simb niŋimb ak, gos yomb ma niŋniŋgiy aŋgiy, Ñinuk biynimb kond mindrep gip ak nup yokek apiy, kumiy tip ak tikjakak. ²¹Nop minim nind aŋgayak ak, kindik ginjun rek ma ayak; pen miŋiy, minim kisenimb dand wip ak, chinup kond mindakniŋ, mindrep giy aŋgip rek giniŋgambun. Kun ak Jiysis yimb nup, perper nep dand aranjun! Tep.

Minim Day Gunap

²²Pen mam ay sikop. Nimbip yiruk ma ginimuŋ aŋgiy, minim paryomb ma apiyn; maŋ won ak apiyn.

²³Mam chin Timotiy nup kalambis ayak ak, miŋiy mis apek, yip niniŋgambur.

²⁴Biyomb nimb gok sek, biynimb yikop Gor ker mindpay gok sek, “Nimb mindpim!” aspun.

²⁵Gor nimbip kond mindenŋ.